

全  
浙  
詩  
話

全浙詩話卷五十

會稽陶元藻篁村輯

男廷珍  
廷琬  
編次

仁和朱文藻映濬

參訂

同邑宗聖垣芥颿

國朝

仲蘊槃

蘊槃字燭亭杭人

隨園詩話 燭亭莫愁湖云晴波嫩柳舊歌臺一眺愁

心畧小開湖影淡拖山色去春烟冷送夕陽來遊絲不

言言  
卷三  
縮金跳脫水調空沈阿濫堆誰更風流問徐九銷魂無  
那索茶盃郊行云雨霽郊圻笑語譁裙腰碧過四娘家  
遊思解渴問荒店春尚慰人留病花遠寺鐘隨遲日度  
隔江山挾晚青斜零星滿地榆錢好賤買村醪敵歲華  
他如月於低處作湖色山漸暝時生水烟皆瘦硬可喜

俞 瀚

瀚字楚江山陰諸生

隨園詩話 紹興布衣俞楚江名瀚久客京師金少司  
農輝薦與望山相公公稱其詩有新意卒無所遇賣藥  
虎丘而亡登九龍山遇雨云浮生徒碌碌冒雨渡寒津

策馬山頭過雲橫不讓人偶成云安貧求自寡書劍漫  
相從且築數椽屋將爲一老農亭空雲可貯院小樹還  
容居近開元寺卧聽清夜鐘戒飲原因病村旗莫浪招  
忙酬花事畢閒養睡魔驕霜色歸蓬鬢秋聲上柳條竹  
爐茶未熟一縷細烟飄他如誰與吾來往西山一片雲  
柳倦欲眠風動舞鳥歌未和雨催歸俱有意趣

王 豫

豫字立夫長興人

炙硯瑣談 長興王立夫豫詩有別才嘗賦若溪絕句  
四十首風調殊佳吾友汪君澤周記其二首爲予誦之

云一春長恨雨瀟瀟記過吳王送女潮輕薄桃花鳴咽  
水縱無離恨也竟銷選勝還須穀穀車石門山色美何  
如茶花開遍深深塢暢好風光是夏初

李 暕

暕字宗表錢塘人

炙硯瑣談 詩人嗜酒自古而然往往見於篇章自得  
妙理頃讀錢塘李宗表暕煮豆酌白酒歌尤雄快歌云  
煮豆酌白酒豆肥酒氣溫相對二三子其樂難具論君  
不見曉來雨過東家村叢叢豆莢生籬根阿翁提籃跣  
雙足采摘采摘呼諸孫歸來笑指老瓦盆酒波猶帶新

糟渾田家酒具如鶴樽一盃入口春無痕兩盃三盃鯨  
濤奔四盃五盃如江吞須臾飲至百十盃眼花耳熱低  
乾坤憶昨豺虎如雲屯旌旗滿目烟塵昏殺人如麻血  
成海十室九家無一存大臣自合死社稷况叨厚祿承  
君恩近聞省府日筵宴椎牛宰馬齊崑崙吾徒布衣在  
草野憂心惻惻懷至尊嗚呼蕭艾滿城邑馨香不數蘭  
與蓀呼童炙豆復進酒呼兒爲我關柴門又題鍾馗移  
家圖云綠袍進士掀怒髯饑來嚼鬼如蜜甜酸風苦雨  
攪白日移家欲住山陰尖隨兄小妹臉抹漆眼光射人  
珠的皜鬼奴鬼妾千萬形鱗怪貓妖最蕭瑟勢能使鬼

鬼不違髑髏在後嗤鍾馗英雄如山堆白骨莫倚區區  
手中笏

錢應金

應金字而介嘉興人

炙硯瑱談 嘉興錢而介應金咏沈甫受蝶花居秋色  
云沈郎八咏世爭誇草色庭中不讓花秋氣逼人清入  
夢夢騎蝴蝶到君家騎蝴蝶創語亦夢語么麼栩栩安  
必南海蝶之大如蒲帆肉重八十斤耶

沈謙

謙字望庵餘姚人

炙硯瑣談 餘姚沈茂才望庵謙詩才沈博絕麗每遇  
快聞奇事輒灑灑數千百言令人驚嘆欲絕近體詩間  
喜作白陸語如云一春易做還家夢二頃難謀負郭田  
覺醺醺有味也

夏復森

復森字培叔嘉興人

隨園詩話 余知江寧過觀象臺見有題壁者云草色  
荒臺過雨遲短牆過栢暮雲垂桃花紅引遊人去獨自  
斜陽讀斷碑問之僧人乃嘉興夏培叔名復森者所題  
因聘修志書耳聾興豪一日從嘉興還金陵告余曰家



中手植老梅一本去冬爲僮所伐乃弔之云老梅移植  
廿餘載客裏歸看已作薪無復橫斜舊時影負他多少  
後來春秦淮夏集云傍晚紛紛載酒卮有箏琶處過船  
遲一河風月無人管都付橋南楊柳枝亡何歸里卒相  
隔三十餘年聞其子鼎中庚子副車余感詩人有後爲  
之狂喜

孫羽芳

羽芳字君寶號鶴林仁和諸生

湖墅詩鈔 孫鶴林本楊氏昔餘姚孫忠烈孝子文恪  
父子皆楊氏壻楊與孫累世同年累世聯姻主事思環

復爲楊氏館甥無子以姪鶴林爲嗣鶴林始姓孫子卽  
永謀也鶴林嘗作寫懷詩云無端幻出夢中身悟徹浮  
生豈論貧自有本來真面目何妨別去舊頭巾釣殘落  
日波間餌伐破閒雲嶺上新三萬六千如一日逍遙塵  
外問天津

葉溶

溶字容水號鶴塗錢塘歲貢生有文集二卷

葉鶴塗文集 柳溥撰傳畧云先生文集上下二卷皆  
雜體古文末載二詩一題右軍據石圖云先生初學衛  
夫人波瀾意度如通神忽然悟得作者意戶庭獨闢非

常倫龍跳虎卧真千古上掩元常下誰數  
虞褚顏歐一代英雲初俎豆追先祖真跡由來不易多  
金錢購本皆摩挲誰人模得塵外表素紙據石無臨模  
前人論畫非形似如何俗手高籠鵝一題程穆倩先生  
畫云穆倩先生篆刻工腕指所到生秋風漁陽老人嘆  
奇絕謂似木葉雕蠶蟲更以餘力作妙畫手眼不與凡  
史同雲烟尺幅邈千里但覺一氣浮洪濛懸崖萬仞寒  
泉下落有晴雪生喬松松風謾謾洗塵胃泉聲潺潺盪  
俗胸於今下世數十年翰墨零落多無傳世上幾人寫  
山水誰復意在揮毫前胥原先生有畫癖好坐書窗摹  
古跡好山好

水無浪過妙筆妙墨多寶惜興來揮灑真瀟疎臭味直  
與程相得偶過邗市一摩挲瞥見舊物生嘆息世間何  
事不如此豈獨縑素無收拾解囊購得重裝池焚香沽  
酒攜自適想見兩賢會意處神交原自無今昔我有老  
友仇青士胸破萬卷無與似欲探維揚獻與史果見幽  
人多豐芷歸來爲我述賢蹤忽起哦成金石調陡覺眼  
底生奇峯思君不見程穆翁念我不解君與從逸興由  
來每不淺吳山長嘯凌虛空

沈中稜

中稜字穗先平湖諸生

國朝兩浙詩鈔 穗先性灑落鄙屑科舉業謂人生勞  
精斂神於無用之學受人家國而不知措施亦安用此  
爲也其甥爲曹侍郎倦圃人目爲是舅是甥詩學少陵  
惜皆散佚存者寥寥也嘗游餘杭南湖有詩云朝出武  
林門暮及餘杭郭千頃見澱湖浩漫更迴薄清和蒸雲  
霧榆柳鬱參錯側岸渡竹橋傍沙立茵閣蘆笋已抽芽  
新篁漸解籜野鳬飛且唼遊魚自跳躍幽期協勝地客  
情散塵縛此地頻往還杖履暫止託

方 霖

霖字雪屏石門人有雪屏詩存

雪屏詩存序

朱方  
藹撰

語兒鄉有詩人焉曰雪屏方君曩

時每聞穆門周先生稱之不置君捐館後令嗣長青來  
桐鄉與余款洽述君之爲人敦孝弟尚樸誠日與友朋  
飲酒賦詩爲樂又性喜遊覽歷經江淮齊魯燕趙登高  
望遠臨風弔古旗亭酒市留題殆遍先世本歙人因省  
其舊族復遡漸江而上窮黃海之勝不治生產家遂中  
落爰挈長青客諸近邑長青善繪事筆墨所營藉以供  
君遊讌之資壬午歲君乃卒於梅會里之古南僧舍君  
詩絕去町畦渾成秀逸頗得元和大歷詩人遺響下亦  
不失爲石湖劔南至於天目觀雲錢塘觀潮天都觀瀑

諸篇筆力沈雄又將追蹤乎少陵杜氏者詩之工若此  
天目山看雲云絕壁勢全俛猿狖愁攀緣老僧導我  
上舉足心惛惛怪藤藉引手一躍空中懸心知此一墮  
渺乎入寒烟陽崖轉暗谷曲折蛇易穿置身若天半方  
知躡山巔雲氣莽鬱勃膚寸周迴旋吞吐益靉靄四顧  
紛纏綿俄如人馬來冠蓋擁而前朱衣蒼水佩寶玦珊  
瑚鞭忽然如窮餓鶉衣聳寒肩轉瞬復如初娑束殊翩  
翩倏爾爲老翁瞥然化嬋娟鬚眉近可覩粉黛遙相憐  
忽如衛霍第丹雘逼中天臺榭何崔嵬忽變爲原田忽  
如山鬼醜忽如湘娥妍靈鳳或翔翥神虬或蜺蜺驀然

天然起散去何處邊纔見衆峯出一一浮青蓮詭異駭  
心目恍惚言難詮還疑身似雲幻化亦偶然 錢塘觀  
潮云海門一激聲怒號極天晴雪寒滔滔羣波洶湧驅  
萬馬千山淚沒沈六鼇帆飛迎浪浪中舞瞥見傾欹失  
樓櫓須臾復出勢若雷一擲俄看千里許錢王當日眞  
英雄硬弩突發迴腥風陽侯遁逃天吳走掀波不敢驕  
魚龍江濤自是勢束縛金塘亘古堅難攻至今鐵箭猶  
在眼遠同禹轍垂神功波平潮落見龍脊買酒江樓看  
魚泊依舊澄江如練明越山相向浮空碧 天都峯觀  
瀑云在山不知奇峯巒失背向在山不知高咫尺隨俛



仰一出雲中嶽始覺神益王厓壁森開張舉目非一狀  
高低三十六一一展妙相殷雷鑿空礪飛流下疊嶂白  
霓天際來其源不可量寒聲徹巖壑百里勢一放胸中  
萬斛塵及此可滌蕩

余文儀

文儀字叔子號寶岡諸暨人乾隆丁巳進士仕  
至尚書

越風 寶岡立春詩青旗細浥農祥雨綠勝輕搖花信  
風太平春色於十字盡之

陸飛

飛字起潛號筱飲仁和人乾隆乙酉鄉榜第一  
人工畫

湖墅詩鈔 筱飲嘗過河塍施贊伯先生舊居有詩云  
耆舊棲遲地經過嘆有餘亂離還結客貧病始遷居秋  
水此間渡寒雲何處廬人傳有賢子零落竟何如

隨園詩話補遺 錢塘陸飛字筱飲乾隆乙酉解元性  
高瞻善畫工詩慕張志和之爲人自造一舟妻孥茶竈  
悉載其中遨遊西湖以水爲家揚州遇雪云雨隨微霰  
集船與斷冰爭渡錢江云萬弩尚餘沈鐵在羣山渾欲  
勒潮回爆竹云縑袍易裂拋宜遠濁酒能醒近未妨

近來習尚丈夫多臂纏金鐲手弄椰珠余頗以爲嫌而  
謹厚者亦復爲之陸作詩刺之云我聞遠賈多艱虞纏  
金或以資窮途途窮未必非懷寶慢藏亦足來萑苻世  
人金多揮不足舉袖滿堂黃映肉指環臂釧乃女子男  
化女兒何日始南方草木椰最久實大如瓜漿作酒何  
年落子比元珠一串摩尼時在手有手不弄琴與書有  
手不把犁與鋤可惜白日空摩挲不有博奕猶賢乎

徐垣

垣字紫庭號芷汀山陰人乾隆己未進士由庶  
常改主事官至貴州布政使

越風 芷汀荊州懷古詩云英雄爭戰有時休巨鎮天  
開楚上游荒砦於今空壁壘霸圖何處問孫劉甌墻影  
帶巫陽雨草樹聲含鄂渚秋憑弔興亡已陳迹嚴城寒  
漏動鄉愁此詩格調在錢劉之間

盛百二

百二字秦川號柚堂秀水人乾隆戊子舉人溜  
川知縣

柚堂筆談 渺渺臨風思美人荻花楓葉帶離聲夜深  
吹笛移船去三十六灣秋月明此姜白石過湘陰寄蕭  
千巖詩也長沙志誤爲許渾全唐詩丁卯集亦載之余

於壬子之夏自長沙歸棹過三十六灣有句云嫋嫋江  
邊蘆荻風蘭舟連夜發湘東笛聲三十六灣月誰念當  
時白石翁

張羲年

羲年字淳初號潛亭餘姚人乾隆丁酉舉人授  
國子監助教職銜戊戌欽賜進士一體殿試  
海嶼詩話 潛亭和泊鷗莊詩中有過江日報平安竹  
冒雨人傳笠屐圖之句爲人膾炙因泊鷗主人家住蕭  
山也潛亭好學能文廣交游有肝膽分修四庫方蒙  
恩賜進士未及殿試病卒有才不稱可悲也

顧青選

青選字燦南蕭山人貢生官鎮海訓導

海嶼詩話

燦南由都門歸有雜感詩三十首如眼穿

天一角腸斷路三叉獨足憐狼狽爭心嘆觸蠻詩窮  
五際解易夢三爻滯月連幽薊流波入渾灤等句屬對  
工雅絕類劉後村

胡允文

允文字彥士號容齋仁和人 有藝經堂詩草

藝經堂詩草

沈梅跋

丁鶴峯作胡容齋小傳其畧云容

齋儻士也居艮山沙河之濬貧甚落落不偶惟詩酒

自娛嘗館穀於鹽官乙未秋遘咯血疾辭歸明年卒年  
僅三十七不娶無嗣凡詩文稿若干悉被後母燬去止  
此十五首幸在鷺峯處得留餘不可問矣其病中述感  
云懨懨支枕一春餘如此襟懷病那除自縛正如蠶作  
繭因人寧免食無魚飽嘗辛苦饑爲客絕意功名未廢  
書漂泊年年成底事思量真欲侶樵漁

徐鳳木

名未詳建德布衣

隨園詩話 癸酉春予在王孟亭太守處見建德布衣  
鳳木席間吟一絕云自笑不如原上草春風吹到也

開花除夕在外云閱歷深知客路難非關白首戀江干  
歲除一息爭千古莫作尋常旅夜看武進莊念農初宰  
建德卽往相訪贈詩云玉峯花影颺簾旌罨戶閒雲靜  
不扃未必山城無綺皓斯人卽是少微星粗官未敢師  
嚴式泥飲無由續舊題劇喜少陵居杜曲得閒還過浣  
花溪鳳木得詩喜刻之集中後莊歿十餘年詩多散失  
其子宸選搜尋不可得予於鳳木集中鈔此與之嗚呼  
使無鳳木代爲之存則人琴俱亡矣豈非愛才之報乎

王家駿

字健菴錢塘袁枚甥



隨園詩話 甥多佳句如乍見波微白方知月驟明一  
編如好友宜近不宜踈衣因亂疊痕常皺書爲頻翻卷  
不齊宿雲似幕能遮月細雨如烟不損花停足恰逢曾  
識寺入門先問舊交僧曲引急流歸遠港微刪密葉顯  
新花伏枕苦吟無好句描詩容易做詩難皆有放翁風  
味

邱 颿

颿字無恙山陰人

隨園詩話 戊申春余阻風燕子磯見壁上題云一夜  
山風歇僧埽門前花又云夜聞楸枰聲知有孤舟泊喜

其高淡訪之乃知是邵明府作未幾以詩見投長篇不  
能盡錄記竹枝云送郎下揚州留儂江上住郎夢渡江  
來儂夢渡江去若耶湖水似西泠蓮葉波光一片青郎  
唱吳歌儂唱越大家花下並船聽又夢中得句云澗泉  
分石過村樹接烟生皆妙邵名颿字無恙山陰人

### 吳飛池

飛池名未詳杭人

隨園詩話 杭州吳飛池學詩於樊榭先生先生愛其  
紅蓼花深冷葛衣一句謂可鐫入印章其澶州雜詩云  
晨光黯黯樹稀微雲帶炊烟濕不飛多少人家秋色裏

滿天白露漫柴扉過洛陽問牡丹云花濃洛下種應真  
我却來時不是春到耳盡誇顏色好未開先賞斷無人  
他如林間一鳥過池面數花欹岸仄疑無路燈明似有  
村曉月光微難辨樹西風吹冷不知衣皆清脆可喜

張淇

淇字漪園號竹坡又號石農錢塘人有吟蟲集  
吟蟲集節錄錢塘張竹坡先生書名重於當時人罕

序文

有知先生能詩者生平數十年中遊跡所到徧江湖淮  
湘間題咏贈答日不暇給而皆不留其稟其家居閒適  
陶寫性情之作僅手稿三數冊積詩不過二百五十餘

篇歲乙酉予館振綺堂汪氏主人漁亭比部倡爲鉅花  
詩同時和者甚夥見先生一詩在焉先生歸道山迄今  
十閱寒暑先生長嗣笑田檢理故篋見先生手稿無恙  
編錄爲四卷仍原題曰吟蟲集屬予校定予受而讀之  
開卷無多葉則鉅花詩宛然如昨先生結句云就中縱  
費推移力贏得時時開落頻向爲比部所擊節其他如  
白秋海棠云莫向秋風苦羞澀主人原不愛臘脂玉蘭  
云蘭香兼玉質高聳出雲端笑殺看花者都來仰面看  
咏松云江海瀟瀟風雨夜倚窗只聽老龍吟米山云欲  
借頑雲封谷口不教車馬到閒門詠梅云孤山人去風

流盡冷蘂寒花莫亂開詠蟹云雌黃滿腹堪驚世何事  
田間覓口糧類皆託意深遠耐人咀味而與世枘鑿之  
概亦默寓其中

王普

普字杜洲蕭山人諸生

海嶼詩話 杜洲爲詩以琢鍊爲主五律尤爲擅場如  
浦雲眠野艇岸葉冱寒簷林青山過雨舟急浦迴潮漿  
打月光碎風吹山影搖皆佳句也惜不永年後又式微  
詩稿散失已盡

俞永思

永思字鶴岑會稽人明經官永豐教諭

越風 鶴岑春日過花神廟云往事崔園且漫論寒幃  
無奈欲銷魂日斜旛影下虛壁時有杏花風到門有十  
六國春秋小樂府宛似漁洋三國小樂府而古樸勝之

孫霖

霖字羨門歸安人寓居杭州賢福巷

炙硯瑣談 歸安孫羨門霖亦嵌竹枝詞云庶魚庶草  
劇難名每訝寒宵壁虎鳴一種綠毛么鳳好也誇文采  
滿東瀛自註倒挂鳥似鸚鵡而小翎羽鮮明紅衫綠衣  
綠樹循繞鉤嘴短足爪纖而長性善倒挂夜睡亦然卽

東坡所謂倒挂綠毛么鳳也余按綠毛么鳳東坡自指蜀產言之安知不似是而非遽云卽東坡所謂耶卽今東瀛亦遍覓此鳥不得甚矣文人之誇也

汪鵬

鵬字翼蒼號竹里山人錢塘人客遊日本著袖海編

袖海編 汪鵬自述曰日本花街妓女所居曼聲善歌弓腰善舞杜牧詩云百寶嬰腰帶真珠絡臂韞笑時花近眼舞罷錦纏頭似謂是也本國富商大賈恆爲傾動其入唐館也什之一耳進館皆以申刻點名出亦如之

名曰應辦余一詩云紅綃隊隊雨絲絲斜挽烏雲應辦  
時蜀錦尚嫌花樣拙別將金片繡羅縑

周大榜

大榜字虎木號珠士山陰人明經

越風 珠士莫愁湖詩云盧家門巷最清幽轉爲愁多  
字莫愁不信但看湖上月年年蕭瑟荻花秋清音發越  
令聞者塵念都消

沈翼天

翼天字式乾號西村會稽人明經

越風 西村過湯陰縣弔岳忠武云南渡高皇志滿盈



無心收復忤梁城將軍擁衆如違詔丞相加誅更有名  
冤獄千年悲莫有大功一日壞垂成至今古里痴兒女  
也解人前訴不平三四理足辭達前人未經道過

按西村嫻經濟之才工於章奏嘗客吳元戎幕元戎  
被人誣陷並羅織西村時有書吏包芬亦受誣驚怖  
自縊西村曰我死誰爲吳公白其冤者慷慨對訟庭  
侃侃不屈旣而械送京師銀鑰就道堅忍無變色及  
西曹嚴訊無他始蒙昭雪元戎仍開府甬東而西村  
已艱苦備嘗極人世不堪之境矣由是義聲震海內  
公卿大僚幣聘踏至歷游燕趙齊楚秦豫閩粵滇黔  
者四十年垂老歸里門餘年卒其才識過人肝膽近  
古若僅以詩人目之則失西村遠矣

胡濤 胡灝

濤字滄來號葑唐仁和國子生有古歡書屋詩

集弟灝字景梁號雲溪亦能詩

隨園詩話補遺 滄來車遥遥云別酒初行第一尊征

夫結束車在門別酒匆匆三酌過征夫出門車上坐天涯萬事車遥遥山程驛店柳花飄向暮停車侵曉發人在車中長白髮依依相伴不相離唯有車前故鄉月勿恨當時造轂人行與不行由君身門前芳草年年長幾時草上歸輪響其他佳句如雲共菴云夕陽明似畫僧貌古於松雪霽云山容帶粉消難盡鵞鵝淚如珠滴未乾湖上云湖波驟長連宵雨山粉徐收過午風落葉云辭柯早帶新霜色委砌空含舊雨情俱絕清妙置之樊榭

集中幾不可辨

徐師愈

師愈號謹菴德清人稱孝子載郡志

沿硯山房集 孝子性徐氏諱師愈號謹菴德清之麻  
溪里人幼繼伯父爲嗣家貧授徒以養書塾距家十數  
里早晚必歸省後親老喪明以舌舐目數月而疾愈事  
載郡志余在豫章聞諸孝子之孫賜厚述其事如此孝  
子有早行絕句云侍膳常擎夢裏杯紙窗初白夢初回  
曉寒怕切倚閭望一路濃霜踏翠苔

孫湘

湘字元衡歸安人

海外異錄 海蟹翠色沙魚胎生家元衡抵澎湖澳詩  
翠蟹胎魚堪入饌竹灣花嶼有飛觴

鄭宗楷

攜李人

玉環行紀 自泉亭十里至清溪鎮尋假榻茆氏蹠蹠  
容樓見兩壁淋漓醉墨幾遍就讀之無一佳者惟攜李  
鄭宗楷一絕尚可誦底事生平祇浪遊天台天姥幾淹  
留今宵起我無端感茅店雞聲月滿樓錄竟有客問曰  
壁間詩多矣予何獨取此予曰此詩亦不見佳處唯用

茅店二字却切客蓋非知詩者故以此戲之

汪繩祖

繩祖字亢宗號秋御仁和人諸生

隨園詩話補遺

杭州汪秋御秀才繩祖性倜儻好客

屢次書來招余游西湖而中年抱病遽卒僅傳其雪彌  
勒云搏雪居然瘞佛誇白毫現處絕纖瑕雲中瑩徹鬢  
穿鬢掌上玲瓏塔聚沙顯相別開嚴淨界笑拈還有霧  
淞花日光應照琉璃室隔盡諸塵寂衆譁又題聽秋圖  
云月窟高於絳樹庭桂叢誰占一枝馨年來我是傷秋  
客每遇秋風最怕聽

孫國柱

國柱字顏卓號梅隱平湖人著有梅隱詩存

平湖縣志 孫國柱字顏卓少孤力學事母以孝聞杜  
門枯坐澹如也居矮屋徧栽梅花時有詩人馬愛蘿陳  
青柯輩日夕過從因自號梅隱生平不屑屑於時藝雅  
好吟咏所著有梅隱詩存晚年尤究心史學有感則寓  
之於詩其詠淮陰侯句背面何曾信蒯通他年鐘室恨  
難窮解衣推食牢籠術偏是英雄入彀中讀項羽本紀  
破釜沈舟勝亦勞漫憑意氣逞雄豪如何一下章邯涕  
頓忘先時敗定陶識解超逸柘湖筆談紀其芳草一聯

云得氣也應分雨露托根何事近亭臺萬物言情頗見  
拔俗梗概

王沅

沅字春洲號雁街錢唐人乾隆甲辰進士候補  
主事有思萼堂雜詠

古香齋詩話 王沅居武林雁池街故自號雁街居士  
風姿灑落善行楷工詩嘗走京師與黃葭塘太史施耦  
堂蘭臺諸公游施贈以句云遺我好詩如琢玉看君英  
氣欲凌雲其態度卓犖可想也黔人有以醉鍾馗畫索  
題詩云斗杓宮裏劍含光及第鐘南姓氏香地臘繪圖

懸九夏天中獻瑞本三唐不緣簪笏淪人海仗有鬚眉  
鎮鬼方世醉何須誇獨醒石榴花下進蒲觴題本新奇  
句亦穎妙有飲不繫舫賞菊北海樽酣青眼客東籬花  
送白衣人有宿蘭溪舟次溪灘千里月漁火半江霞詩  
句皆清新秀逸



全浙詩話卷五十終

全浙詩話卷五十一

會稽陶元藻墓村輯

男

廷珍

編次

廷琬

仁和朱文藻映澹

參訂

同邑宗聖垣芥颿

國朝

閩秀

顧若璞

若璞字和知錢塘人明上林丞友白女少參黃

汝亨長婦副榜茂梧東生配有卧月軒稿

池北偶談

葉石林每令諸子女兒婦列坐說春秋近

日武林黃夫人顧氏名若璞所著卧月軒文集多經濟大篇有西京氣格常與婦女宴坐則講究河漕屯田馬政邊備諸大計劃筭中乃有此人亦一奇也

湖海樓婦人集

武林顧若璞黃少參汝亨子婦也早

年稱未亡人盛有綺才所著卧月軒稿行世中有舅姑墓誌銘及外行狀文章詳贍學者矚之孫女坡兒法名智生生而端麗能詩歌小令記其宮詞一首曰長信宮中侍宴來玉顏偏映夜光杯銀箏彈罷霓裳曲又報西宮侍女催又咏雪一首霏霏玉屑點窗紗碎碎瓊珂嚮翠華乍可庭前吟柳絮不知何處認梅花清警殊甚

湖墅詩鈔

顧若璞早寡二子燦燁皆自教之文章節

義爲武林閨秀之冠嘗於秋日爲燦兒修讀書舫泊斷  
橋台歡樹下賦詩云聞道和熊阿母賢翻來選勝斷橋  
邊亭亭古樹流疎月漾漾輕鳬泛碧烟且自獨居楊子  
宅任他遙指米家舡高風還憶浮梅檻短燭長吟理舊  
氈暮雨詩云澗草依依浮玉隄楊拂拂迷烟江上蒲帆  
欲沒村中桑女爭還湖中云湖光渺渺冷烟微汀鷺沙  
鷺停不飛却欲把琴輕別去芰荷分綠上羅衣其孫女  
媛以童身入空門雲棲石公爲之祝髮名智生翛然坐  
脫異香發紅光顧夫人嘗命題菊花詩云簾幙暗生香

奇葩勝艷粧不隨秋草萎獨立傲繁霜可得其概矣

闕玉

闕玉錢塘人

湖海樓婦人集 闕玉容貌端麗父母從少絕珍憐之  
已而父亡獨與母暨兄嫂同居宏光時徵選采女誤爲  
賣菜傭所紿遂嫁生子日令玉職爨喂豕稍暇令鋤泥  
蒔灌足去繚約頭如蓬葆晝日黃黑衣服泥污玉怨甚  
仰天痛哭而作歌聞者莫不悲焉未幾卒

王煒

煒字功史又字辰若太倉相國之裔海鹽陳文

學光釋室能詩善畫有熱鑾樓稿

攜李詩繫 海鹽陳光釋室人王功史煒博學敦古詩  
多名句顧伊人稱爲弁幃中道學宿儒不當以香奩目  
之如月光臨水淨雲氣近山多開簾納新燕移榻近高  
柯皆佳句也

吳芳華

芳華西湖康氏室

吳蕊仙詩集 吳女芳華西湖茂才康氏之室也結襁  
三月兵迫錢塘從夫避難天竺道遇亂兵挾之北去題  
詩旅壁有但期死看江南月不願生歸塞北秋之句其

詞良可悼也嗚呼鳳繫鸞愁悵紅顏之無主花殘玉碎  
惜薄命之多艱爲賡原韻以贖幽懷詩曰斷瑟分香萬  
斛愁雲山漠漠水東流邊城夜靜烽烟隔故國風生薜  
荔秋綠鬢朱顏傷寂歷白楊青塚寄溫柔於今玉貌知  
誰賞衰草迷離隔斷溝

馬福娥

福娥名家女適禾人沈宏略所著有斷釵集

詩衡 斷釵詩句清婉綿芊確是閨闈吐屬人日卧病  
云晴光轉處盡知春多病依然此一身塵世久知家是  
客年華又見日爲人愁看曲裏梅花落驚對庭前彩勝

新沈冰香殘茶汁冷薄寒無那透重茵春懷云日暖閒  
庭草色明傷春綺閣伴茶鐺吹簫自作秦樓想咏絮羞  
傳謝女名睡裏花香遲蜨夢靜中窗紙聽蜂聲曰歸惆  
悵跂予望却羨翩翩燕羽輕暮春病起東姑母陸夫人  
云庭砌蕭疎細草勻韶華病起惜殘春一籬菜暖粘花  
蜨幾片花飄上繡茵少婦閨中粧似舊垂楊陌上綠還  
新封侯自古良非易不厭詩書夫婿貧二詩俱不遜皆  
令風致

王端淑

端淑字玉映號映然子山陰人王思任女宛平



丁肇聖配著有吟紅集

蓮坡詩話 毛西河選浙江閨秀詩獨遺山陰王氏王

氏有女名端淑寄西河詩結句云王嬙非一不無顏色怎

奈毛君筆下何引用二姓恰合

按西河檢討曾有雨中聽三絃子適文氏王映將之  
吳下過宿蕭城書感寄示七古一篇其篇中云江東  
女氏當代希會稽王氏多烏衣著書不讓漢時史織  
素自憐機上詩精暉閣中父書在綵筆長篇世後  
吟成紅雨滴口脂行得青藤繞裙帶風流遺世後  
殊將從秦氏聽啼鳥朝行賣珠暮無粟天寒袖薄  
肌膚可憐兵革滿衢路欲望西陵過江去崎嶇宜  
進退難抵恐行來且多誤非不誇其才貌惜其途窮  
此詩大抵作於玉映寄詩之後應屬解嘲恐難補  
又按陳其年云山陰王端淑意氣犖犖九長史學  
季翁嘗撫而愛憐之曰身有八男不易一女今人但  
如其精於詩學無有知其通於史學者西河著書不

讓漢時史記句亦  
可謂端淑實錄

陳瑞麟

瑞麟字若蘭海鹽人著有綠窗閒咏

湖海樓婦人集 海鹽陳若蘭著閨辭一百首中有云  
垂柳依依綠影生菱荷亭上設棋枰局中彈出縱橫勢  
笑問檀郎若個贏又云春閨三月養吳蠶南陌柔桑滿  
竹籃爲避行人回步急不知髻上墮牙簪又云女伴相  
邀織綺羅纖纖素手弄金梭晚成尋取紅牙尺較得工  
夫若个多又云閨中喜作道家粧雲錦裁成綠羽裳學  
戴星冠簪日月侍兒齊綰髻雙雙又云一自檀郎赴玉

京殘燈挑盡淚盈盈黃昏又值芭蕉雨不管人愁滴到  
明如此吟咏去花蕊夫人何遠

徐簡

簡字文漪嘉興人吳于庭副室或云後歸楊中  
翰

風雅閒談 文漪傳有宮詞云沈香亭子玉勾欄植徧  
名花按月看第一莫裁紅芍藥此花開日又春殘詩意  
甚新如改嫁爲真則未句遂成詩識

祁德蒞

字湘君山陰人祁忠敏公季女同邑沈子合配

詩衡 湘君有美人臨鏡詩二律爲人傳誦如一奩秋水寒無影十樣春山淡有痕又方愁對月圓還缺其柰看花幻不真等句洵屬描寫得神其姊德淵德瓊俱有詩名忠敏家子弟悉美丰儀故其時有祁門男子盡佳人婦女皆才子之譽

### 田玉娥

玉娥山陰人童筠配

蓮坡詩話 童筠山陰人遊毛大可檢討奇齡之門工詩文幼聘姑女田玉娥未婚而童以事北上田送之詩曰錢塘相送遠過此是杭州月杵春鄉夢霜砧搗客愁

三才言言 卷三十一  
渡頭千樹老江上一帆秋無限臨岐意東西水自流後  
童竟不歸而田以天亡

翁桓

桓字少君錢塘人汝遇女處士胡介妻

王阮亭集註 彥遠妻翁桓字少君重過西湖詩云風  
風雨雨鳥空啼草綠山腰水滿堤晝閣已傾歌舞散十  
年重到六橋西

朱柔則

柔則字道珠錢塘人沈用濟室

國朝詩錄 方舟爲紅蘭王人客道珠遙寄故鄉山水

圖主人作詩有應憐夫婿無歸信翻畫家山遠寄來之  
句方舟旋歸當時傳爲佳話

按道珠有約顧春山河渚觀梅詩云相期河渚玩春  
華一棹迎風路東歸樓外有梅三百樹美人不到不  
開花末句書出自春山口則自矜出於方舟口則偏  
愛道珠言之乃覺不類且慈并使春山聲價頓增  
十倍春山  
係方舟妾

陸莘行

莘行麗京女錢塘人適海寧祝氏

拙堂筆談 稼堂太史送其猶子至邊作度關曲蓋身  
歷其情景不白知其悲楚激昂他人擬作決無此真性  
靈發出也康熙初湖州莊氏史禍吳越名士因嫁名羅

其害者十七人子孫皆發遣而潘力田先生遂與其難  
後雖逢赦然安其風土而不能歸矣十七人之外如陸  
麗京范文白查伊璜賴有力者爲之代白故得免事平  
麗京披緇獨往雲遊四方後雖暫歸究不知所之麗京  
之女名莘行七歲卽能詩文著有雲遊始末以紀其事  
莘行後歸園花祝氏

柴靜儀

靜儀字季嫻仁和孝廉雲倩女虎臣姪女廣文  
沈漢嘉配有凝香室詩鈔北堂集

湖墅詩鈔 柴季嫻工書畫與林以寧亞清顧姒啟姬

錢雲儀馮又令稱蕉園五子詩有合刻季嫺卽用濟在  
汴兩別駕之母也嘗作詩與顧啟姬云美人家住西湖  
湄芙蓉千葉含露垂想像芳姿邈難卽令人長嘆心中  
悲安得移居作鄰里與爾旦暮長相隨長相隨遠離別  
忽得錦箋一尺長不數郢人歌白雪多君一片心兩地  
相思深床上古琴閒不理往往風雨作龍吟秋來釀得  
金花酒開樽獨飲不甘口况復淒其對衰柳欲邀知己  
共論文香車肯過蓬門否

丁玉如

玉如字連璧仁和人黃汝亨孫婦



卧月軒稿 冢婦丁氏壙志曰冢婦丁名玉如字連璧  
仁和漳溪里人也祖曰奉新令梅汀公周父曰光祿丞  
季淵公汝馮母曰盧孝懿吏部德園先生女也三索而  
得婦歸余子燦燦爲先參議寓庸公冢孫故稱冢婦云  
余不幸不天先夫子文學東生公早世風雨飄搖賴參  
議公愼撫之天啟丙寅公又捐館舍時燦雖補仁和博  
士弟子員者二年所猶垂髫耳逆婦歸婦年纔十五性  
好緩急人燦之友告急燦簡簡無以應中怛怛焉婦偵  
得之曰吾安得愛簪珥而俾君子困於義且焚其券曰  
通財之謂何以負責也從余讀唐人詩其寄燦有云故

有愁腸不怨君語幾於怨誹不亂矣余有河魚腹疾婦  
扶掖余垂六十晝夜湯藥餅餌非婦手調不甘病間顧  
視婦已骨柴立矣呻吟床第間時囁囁誦楊忠愍椒山  
自有胆何必蚺蛇胆之語以壯心鬼卒賴良藥以活燦  
買舟讀書西湖者凡二年或招婦共泛婦輒爲書謝不  
一往也曰君兩喪未葬寡母在堂且吾亡母地下亦賴  
君之餘也波及之敢以兒嬉荒君業哉其端謹勸學率  
賴此

錢鳳綸

鳳綸字雲儀黃汝亨曾孫式序配有古香樓集

古香樓集序

毛際可撰

虎林之著姓曰錢與黃余先銓部

公與黃貞父先生先後令鍾陵以清節相友而錢子安

侯同予戊戌成進士則兩家蓋世講云貞父先生之冢

婦和知顧太夫人卧月軒集傳誦海內又數十年其曾

孫婦雲儀錢夫人復以詩聞夫人安侯同母女弟也夫

人善持家政與夫子式序相敬如賓其爲五七言古及

律絕體沈雄妍秀各擅其勝而比事屬辭尤有合於風

人之旨集中所與倡酬者若柔嘉則夫人之娣若重樞

則夫人中表妹以及馮柴林顧號稱女中大家者莫不

雲蒸霞蔚聚於一時虎林山川之靈異萃於閨房之秀

若是

楊琇

琇字倩玉仁和人

東城雜記 女郎楊琇字倩玉家東城之羊市明慧娟  
靚雅善篇咏有西湖竹枝詞云斷橋西去竹間廬不道  
山孤人亦孤嶺上梅花知妾是水中萍葉似郎無人皆  
傳誦之後歸沈適聲爲妾

談則 錢宜

則字守中適吳吳山宜字在中吳吳山繼室

湖墅詩鈔 談守中適吳吳山稱陳次令爲陳姊嘗有

詩題云陳妯彌留時斷句口授妹書者歿九年後竹紙  
斜裂止存後半第一章首句僅北風吹夢四字末句却  
如殘醉欲醒時七字今補之云北風吹夢欲何之簾幕  
重重只自垂一縷病魂消未得却如殘醉欲醒時又錢  
宜字在中吳吳山繼室亦補爲一絕云北風吹夢斷還  
吹一枕餘寒心自知添得五更消渴甚却如殘醉欲醒  
時

陸青存

青存字若筠濟寧人父爲守戎錢塘吳孔皆聘  
爲繼室

湖墅詩鈔 陸若筠有詩集在阜聖公孔傳鐸序而傳之集中清夜看書一絕云相對蒼涼景有餘月明風靜意蕭疎人間何事堪惆悵已有消愁一卷書

吳淑

淑字伴梅陸若筠長女適新安汪碧園

湖墅詩鈔 吳伴梅爲新安汪碧園之配碧園有詩寄懷伴梅依韻酬之云涼生羅袖入新秋燈下微吟火欲流窗外無端風雨過懷人江上起離愁

郭娛

娛字景曹杭人儒士天一女適進士王礪松

湖墅詩鈔 郭景曹詩思幽折有妹字雨洲適東甌段氏景曹寄詩云姊妹經年別吳甌千里餘啼殘襟上血望斷海邊魚對鏡思雲鬢因風寄素書書中無別意惟悵久離居又鄉思雜咏云偶於清曉捲珠簾好放雙飛燕出簷忘却北身原是客又取山色入詩奩

楊慧林

慧林字雲友號林下仁和人張遂辰側室

名媛詩緯

楊慧林字雲友號林下杭州人工畫山水

湖上李漁所編意中緣傳奇蓋爲慧林而作也張遂辰悼楊姬雲友詩畫樓猶咫尺寒食去年同草憶裙腰綠

花銷人面紅斷橋烟似水殘夜雨兼風却得空離恨埋  
香佛骨中自註墓在斷橋聖果寺

郭素嫻

素嫻錢塘人監生傅廷標配

雨村詩話 半村室人郭素嫻善詩對月句曲沼影搖  
楊柳碧畫闌香繞鷓鴣斑寒夜句夜靜庭花如露咽月  
明寒雁夾霜飛頗有晚唐人風味

商景徽 徐昭華

景徽字嗣音會稽人商周祚女上虞徐咸清配  
有味雛堂集



昭華上虞人徐咸清女諸暨駱加采配著有花

間集

西河詩話 始寧徐大司馬舉義幙時余甫丁年遊司  
馬軍門其次君仲山兄事予如家人然及余出遊仲山  
每招余以詩語甚哀暨中道潛歸匿其家喜甚其內人  
商夫人女昭華皆閨秀也仲山倡爲讀西河新句詩令  
和之商夫人詩云芙蓉露下小池秋金鴨烟消宿雨收  
爲讀西河詩句好都梁艾蕪滿粧樓又云彩筆翩翩映  
玉臺頻將綉帙向風開可憐杜甫驚人句不若陳留曠  
世才昭華詩云胭脂花落覆紅蠶獸頸初垂火自含爲

讀西河新句好渾如秋月照澄潭又云少小愁觀白日  
詞蘆中人去竟何之不知擊絮溪邊女曾讀西河瀨上  
詩 徐昭華請予試題余爲示其二一擬劉孝標妹贈  
夫一賦得拈花如自生卽沈滿願咏步搖句也其擬詩  
云流蘇錦帳夜生寒愁看殘月上闌干漏聲應有盡雙  
淚何時乾又云芙蓉花發滿地紅黛烟香散度簾櫳畫  
眉人去遠腸斷春風中其賦得詩云明珠照翠鈿美玉  
映紅粧步搖移彩色風回散寶光蛛絲髻上繞蝶影鬢  
邊翔誰道金玉色皆疑桃李香 昭華又請試會昭華  
畫蝶工甚遂命題畫蝶五絕限東韻昭華立成云蛺蝶

翻飛去翩躚彩筆中雖然圖畫裏渾似覓花叢誦之一  
座驚嘆余喜爲和詩云滕王有遺譜描之深閨中羞殺  
東園蝶翩翩滿綠叢蓋言羞時輩也時余又爲二絕書  
傳是齋誌欣幸之意一云四十年來老自驚新奴門下  
女康成不知書面練花好試看堦前帶草生又云深堂  
樺燭照銜卮隔幔新吟畫蝶詩不是小鬟頻乞試那知  
閨閣有陳思小鬟指女奴將命者後張遠首和畫蝶詩  
韻一時傳和竟至盈卷予另有四詩不和韻亦錄卷末  
老友徐仲山以七夕日死余自喪子喪明後不能作  
哭詩故舊時哭友詩三百零首祭文一百零首一夕焚

去以爲學說未達多此嗽唧余集中並無哭友題并祭  
文一門部可驗也適徐昭華以禁日哭父擬木蘭詞寄  
余余讀之不覺淚下然仍不能作哭詩卽以此存集中  
當哭仲山作時汪東川司城在坐曰聲調哀苦體致愴  
惻有女如此卽以當木蘭何過焉其詩曰戚戚復戚戚  
天孫罷機織只道天邊歡會期不道人間別離日人間  
別離真可憐天邊歡會知何年悽悽登我堂不聞烏鵲  
喧但聞老母痛哭聲連連嗽嗽入我房不見瓜果陳但  
見蛛絲蟲網相勾牽前年當此夕天河正瀾瀾分將五  
色縷連作百年卮去年當此夕天柱方傾頽桂陽城北

乘羊去緱氏山頭跨鶴歸况復今年當此夕百歲堂前  
哭靈匹欲晒麻衣兩淚懸但啟書樓寸腸磔天河有時  
挽天星有時轉惟有乘槎一去人萬古千秋不復返穿  
針徒望眼不使淚眼親九華空照地不照泉下人黃姑  
此夕依然度惟有嚴親不知處木蘭空自夜停機願代  
爺行竟無路戚戚復戚戚作此七夕詞欲知此日中心  
苦視此河流無盡期 昭華多哭父詩嘗有登春來閣  
檢父遺帙七律中四句青葱出瓦根俱豁碧柳當窗影  
漸疎捲榻已無新註帖開箱惟有舊藏書又一首後四  
句山長似向空欄斷月隙遙隨小榻圓有女媧無班氏

筆遺書萬卷續何年 余寓大善寺吳尼御符爲天童  
曉公付法以掃塔過謁余謂女僧不當與酬酢遣門人  
徐昭華報之瀕行尼出摺扇乞詩不得已書一律云不  
信纔觀世幡然去普陀傳衣真是錦翦髮尚如螺貝葉  
箱中薄蓮花水上多阿潘方學道相待洛橋波次日越  
中女士台餞於國門見摺扇齊聲索昭華和詩蓋借此  
相類也昭華連和二首其一前身本靈照空日卽彌陀  
乞食施山鳥裴香在海螺鄉程雲外近別思晚來多試  
看千江月徐徐出綠波其二幾欲還慈室無緣款跣陀  
毫分眉際彩掌台指頭螺贈佛留獅尾繡經度貝多龍

宮有神女何處不凌波又送尼詩芙蓉曲岸散紅霞送  
客江邊疎柳斜蘭漿行時飛化雨錦茵鋪處布金沙乘  
盃欲度吳閶水拂塵曾開鑑曲花一自水田相顧去河  
年重把綠袈裟此等純似唐詩若落句則非白傳不能  
矣予門工詩者推盛唐王錫然俱不及昭華以稍解唐  
人法外意也舊所寄政詩嘗受仲山意輒留稿另作一  
帙今散漫不能矣因錄數詩於此爲亡友中郎存一綫  
云 高郵孫孝廉無燁其尊人吏部公以鄉官爲當事  
齟齬瘦死獄中孝廉內人潘係都憲公女孫曾刺血寫  
經以懺救之及潘年五十孝廉以避難歸里錢塘錢石

城進士其內人林以寧吏部公同年女也爲潘作駢啟  
徵詩及越余爲致昭華并索其母太君仲山商夫人金  
應以詩昭華復書云自老父亡後家中筆硯盡棄老母  
并所存詩稿亦付爐火傳是齋頭非復舊時光景矣伏  
讀尊諭并林夫人所撰啟知孫先生家事如此可感老  
母已有誓不作一字門不敢違命且感寫經事勉作一  
首知荒疎已久必得都講改纂後始發去也門不作古  
詩七八年苦無長句對仗故作此體以藏拙惟慈諒之  
予痛老友徐仲山先我而逝其家人朝暮便不無今昔  
之感因并錄其書於此昭華詩云高郵湖水清且漣湖



傍有第高巔。嵒榴花日出。照錦欄。夫人五十饒朱顏。考  
之氏族華。以繁黃門之後。典午遷世。居淮服控海瀾。先  
人嘗着獬豸冠。通家有子孫。巨源以之作配。年又年。自  
從少小。却珮環。鹿車長挽。鮑與桓。公車門下。雖升賢。仍  
如韋素心。所便祇惜中道。遭家艱。勁刃刺尾。及孔鸞夫  
子。賣餅安邱。問還鄉。元節足盡。趼只今日。霽浮雲。鷺健  
持門戶。晚境安覆巢。卵殼猶瓦全。秋風雙翮生。羽翰群  
從。羯末女。令嫺皆言絳帳由文宣。獨憐銓部留荏苒。度  
人經寫百十番。螺脫刺血和淚丸。寫入貝葉。翻紅蓮。予  
母自小愁不年。曾書三部華嚴。戔一藏。佛腹一塔。博其

一送置天台閭夫人爲此更可憐聞之涕下如瀾洸今  
來設悅事足傳顧家閨秀文如椽深慚學步非敢然稱  
觴願祝天綿綿又代詩云綠鬢稱觴日朱門設悅秋聲  
聲宏聳社母德著秦郵下牖專先祀中厨主庶羞身乘  
龍矯矯夫聽鹿呦呦鑑影涵天遠珠光逐水浮伍胥行  
瀨上道蘊出江洲茹藿因蒙難潛形爲避讎庭除迴鶯  
鶯世事等蜉蝣錦繡因書授金經帶血流當年雲作幃  
此日海添籌有壻如徐悱諸兒盡仲謀錫盤和露進黍  
酒帶霜芻山木抽叢桂園花長石榴彩雲迴合處疑汎  
廣陵舟

曼殊

曼殊豐臺花匠女毛奇齡之妾

西河詩話 陳檢討孺人死後其房中人陶三自南至  
以余與檢討親厚願一見曼殊曼殊德陶三爲不食累  
日曰南中無此人也時元夕後三日曼殊作五字詩贈  
陶三云元夕逾三日天花傍一枝二更纔上月翻恨見  
成遲以十八日月下相別故云

黃媛貞 黃媛介

媛貞字皆德秀水人文學黃象三之妹太守朱  
茂時側室

媛介字皆令媛貞之妹楊元勳配

西河詩話 陳何寄子夜歌二章蓋憶予作也其序云  
外人以避讐未歸檢皆令子夜歌用其詞則是貸皆令  
作者其詞曰一去已十載九夏隔千山雙珥依然在如  
何不得環又云白露取荷葉清明種藕枝君行方歲暮  
那見有蓮時舊體蓮本隱憐今惜隱蓮然亦可隱憐以  
余曾自呼阿憐翁故也何予婦無字 陳何貸皆令作  
春懷詩云蝴蝶尋舊樹燕子補新巢只有清江客春來  
漸漸遙

靜志居詩話

俞右言云亡友黃鼎平立二妹一字皆

德一字皆令均有才名皆德爲黃陽朱太守房老深自  
韜晦世徒盛傳皆令之詩畫然皆令青綾步障時時載  
筆朱門微嫌近風塵之色不若皆德之冰雪淨聰明也  
湖海樓婦人集 嘉興黃皆令詩名噪甚恒以輕帆載  
筆格詣吳越間余嘗見其僦居西泠段橋頭凭一小閣  
賣詩畫自活稍給便不肯作吳偉業題鴛湖閣咏四律  
中有夫婿長楊須執戟之句想黃所適定楊氏也

樵李詩繫 皆令文學象三之妹與姊媛貞俱擅麗才  
而媛介尤有聲香奩間書法鍾王人以衛夫人目之畫  
亦點染有致適楊氏元勲夫婦偕遊江湖爲閨塾師以

終有湖上草王端淑曰皆令倚馬自命落紙如烟摘其  
佳篇蒼然勁秀會稽商夫人景蘭贈之詩云門鎖蓬蒿  
十歲居何期千里觀雲裾才華直接班姬後風雅平欺  
左氏餘八體臨池爭幼婦千言作賦擬相如今朝把臂  
憐同調始信當年女校書王端淑有寄皆令梅花樓詩  
云買舸急欲採先春風雪偏羈病裏身聞有梅花供色  
笑客途如爾未全貧凍筆塗殘半是鴉剡溪渺渺竟迷  
槎相逢只恐梅花笑怪我春來不憶家嘗自作離隱歌  
序云予產得清門歸於素士兄姊雅好文墨自少慕之  
乃自乙酉逢亂被劫轉徙吳閭羈遊白下後入金沙閉

跡牆東雖衣食取資於翰墨而聲影未出於衡門古有  
朝隱市隱漁隱樵隱予殆以離索之懷成其肥遯之志  
焉將還省母爰作長歌題曰離隱歸示家兄或者無曹  
妹續史之才庶幾免蓀氏居身之玷云爾吳梅邨製鴛  
湖閨咏四章贈之詞見本集

顧 姒

姒字啟姬錢塘人諸生鄂幼與室有靜御堂翠  
園集

池北偶談 顧姒適鄂生某康熙庚申從其夫至京師  
嘗見其所著靜御堂集小賦詩詞頗婉麗九日子與同

人飲宋子昭工部小園限蟹字韻翌日鄂詩先就顧代  
作也其末云予本淡蕩人讀書不求解爾雅讀不熟蟬  
蜺誤爲蟹余驚嘆

雲鰲齋詩話 啟姬蕉園五子之一也其全集余求之  
累年不可得嘗有花憐昨夜雨茶憶故山泉之句極爲  
綿津山人所賞

### 王御仙

#### 御仙桐鄉人

菊坡詩話 桐鄉女子王御仙有句云夜靜月明人不  
見自家歌與自家聽大有孤芳獨賞知己無人之感可



調善怨者矣

堵霞

霞字綺齋伊令女吳元音配杭州人

雲護齋詩話

堵霞字綺齋進士伊令女吳元音室有

含烟閣詩詞合集綺齋工花卉與胡氏容安有合畫小冊先君子題絕句云童叟江南稱畫逸鵬雲舊記屬君家西湖十二橋頭水流盡落紅無數花

倪仁吉

仁吉字心惠浦江人進士口楨之女

池北偶談

女郎倪仁吉義烏人善寫山水尤工篇什

余嘗見其宮意圖詩其一云調入蒼梧斑竹枝瀟湘渺渺水雲思聽來記得華清夜疎雨銀缸獨坐時先考功兄曾得其全集倪手種方竹數十竿甚愛惜萊陽董樵處士遊婺郡倪高其人斫一枝贈之

金華詩錄 仁吉初爲艷詩作宮意圖一冊爲生平得意之作旣乃脫落華艷一歸平淡所爲文亦閒雅無凡近態

按漁洋詩話亦載此詩祇云倪有絕句不言宮意圖調字作怨字聽來作分明

方、景

景字彩林山陰人

藝苑名言 珊珊之姑方恭人有示長媳楊珊珊詩十年爲媳夢我餘疏水家風樂自如宛似舉場勤苦士粧成惟對古人書

孫蘭媛

蘭媛字介晚德貞長女適嘉興文學陸渭

攜李詩繫 介晚工詩詞多韻語不離脂粉擅寫蘭竹著有研香閣詩王端淑曰介晚詩如行雲流水在有意無意間

彭琬

琬字玉暎海鹽人適總兵馬孟驊之子

攜李詩繫 琬與妹幼玉稱雙壁王端淑曰琬詩巧慧  
俊冷不作淺浮小語妹詩不多見而名句絡繹端淑稱  
其才情兩足似勝姊氏姊惟幽艷妹則英特而博大矣  
彭幼玉

幼玉適文學朱作鵬王口官集中有舟中懷彭  
十駿孫時讀其從姑幼玉遺集詩

湖海樓婦人集 海鹽彭幼玉進士孫適從姑也遺集  
一卷最新警王十一曾以小密花牋書其銀河吹笙一  
詩詩云銀河吹徹玉笙遲清漏迢迢睡覺時巫峽雲歸  
俱是夢鮫人淚滴盡成絲霜衾抱月羞孤影露葉驚風

別故枝王偶遺末二句幽思怨緒故自使人不能終曲也

顏曉思

曉思字宛在桐鄉人

樵李詩繫 王端淑曰蒼老靈異識度宏遠洗去近日蹊逕

顏佩芳

佩芳字芳在桐鄉人

樵李詩繫 王端淑曰一氣雄壯出入意外而靈豁言之句滿幅

談藪 顏芳在桐鄉工部雪臞公女也歸我邑爛溪周氏所著有偶葉草其送春詩最佳領聯云綠酣鶯語濕紅瘦蝶魂癡自是佳句

沈 珵

珵字東南嘉善人順治己丑進士工部主事丁彥元配

攜李詩繫 王端淑謂珵詩刻畫入情處直令物無遁形雖少陵復起不能過也

陸觀蓮

觀蓮字少君別號雨鬢道人嘉善人桐廬及山

夫丹生配

攜李詩繫 山夫初居吳之專諸塔右復隱震澤之西  
村草屋蕭蕭烟火時絕惟與道人唱和比舍聞歡笑聲  
則道人詩成山夫擊節而歌林鳥棲宿皆驚起子訥女  
默道人恒授書於山夫有詩曰室中有高士十年樂饑  
虛又曰憐渠最幼小獻歲解吟詩蓋自詡也復移住嘉  
興盛澤三年最後以避水患隱嘉善蔣湖二西園亦三  
年康熙丁未山夫將移家入九峯道人忽疾逝道人嘗  
自集其詩曰蔣湖寓園草顧有孝爲序題之曰父氏閨  
隱集并附其女默之作焉

及默

默字齋李小字默姑嘉善人父丹生山夫女

攜李詩繫 姑生

九歲能詩山犬有元旦家集

聯句姑首唱焉山夫奸遊獨姑與母居詩益工凡刺綉  
刀尺無不入妙習小棍墓畫李龍眠白描大士年十六  
未字母死三日姑亦卒姑容貌端麗聲影不出愛管夫  
人畫竹一幅與同卧起再玩好文石子十許枚小白鷺  
罌二器凡零香斷墨殘繪剩綉山夫悉內之棺其自跋  
詩卷云默三歲飄零從二親於外郡十年夢想思一返  
於故園蔣湖以避水而來舊廬若望洋而止老母倚北



堂而興嘆中夜挾寶瑟以長吟非無慰藉之詞實多於  
挹之調晨窗乍啟琉璃之硯匣自隨夕幄徒熏翡翠之  
筆床不去以是長見笑於鄰女不解看花或見諂於閨  
人何知鬪草情由此遣緒以此深矣駕言當秋攜家渡  
泖攬九峰之奇勝髣髴金庭專一壑之幽閒飄飄雲嶠  
精瓊廡而延佇齊玉獻以上馳曰父曰兄尋采葯之赤  
松旦暮可遇爲母爲女盼傳書之青烏閨閣非遙爰奉  
命於慈闈篇分甲乙冀流輝於彤管字辨宮商庶幾染  
翰而成不須石墨含毫以待有取香茅

全浙詩話卷五十一終